


Keruehorst



um

Hezische

Hof

Marfelle

Kerwespruch



Kerwespruch 1990

Wonn de August soim Enn' zu geht,
koa Frucht meh uff de Acker steht,
wonn alle Quetsche gerobbt soim worn,
do honn mer nur noch Oans im Knorrn,
beim Bäcker werd sich fer wenisch Geld,
e Blech mit Quetschekuche bestellt,
beim Monfred soim mer donn baal jeden Doach,
un allsemoal do werd aa dorchgemoacht,
wonn donn die Kercheglocke leire,
konn des fer uns nur Oans bedeire,
donn es endlich wirrer 'mol soweit,
do es in Worfelle Kerwezeit,
un alle Leit die soim donn froh,
wonn's haaßt: "DIE WORFELLER KERB ES DO".

Gonz Worfelle war wochelong om rotiern,
die Modder war om schrubbe un poliern,
aa beim Monfred alles noach Zitrone rischt,
noachdem die Hertha dorch de Soal gezischt,
koan Krimmel Staab hot's iwwerlebt,
koa Gutsje unnerm Disch meh klebt,
die Donzfläch' wurd mit Wachs geschmeert,
so richtisch wie sich des geheert,
daß de donn Owends uff'em Donz,
beim Walzer richtisch rutsche konnst.-

Om Kerwesoamsdoch ess alles ferdisch,
die Modder macht de Vadder närrisch,
"Baßt die Blus' zu moiner Schminke,
duht moi Deo aa net stinke,
soim die Schuh gebutzt, die Schtrimp noch gonz,
konn ich so zum Kerwedonz?-"
"Wos leit donn mer on doim geschminke,
ich gehn zum Monfred Oaner drinke,
wonn d'es packst bis Uhres zeje,
konnst'e veelleicht de Kerwegag noch seje,
wonn net, do biste selwer Schuld,
äwe reißt mer die Geduld!-"

Beim Klinke Monfred es derweil de Deiwel los,
in de Kisch steht Oamerweis die Soß,
zwaal halwe Sei die leije uff'em Disch,
on Kerb do es halt alles frisch ! -
Die Karin hot alles unner Kontrolle,
sogar de Monfred hippt erum wie'n Dolle,
net hinnerm Biffee wie mer kennt denke,
noa, uff de Donzfläch duht er sich verrenke,
die Ingrid es om renne un om schwitze,
die Hertha duht in de Kisch rumflitze,
un die Kerweborsch, ehr kennt mer's glaawe,
die donze, das de Soal duht staawe,
es Ortsche feiert, wos soll ich soache,
koaner duht sich meh mit Soje ploache,
fer vier Doah do es alles grod vergesse,
so feiert mer bei uns in Hesse !



Die letzte Woche, do war große Hitze,
 die gonze Leit warn iwverall om Schwitze,
 de Bach war trocke, de Borrem verdorrt,
 Wassermongel gab's in jedem Ort,
 die Sunn' war om brenne, tagelang,
 de Bauern wurd's schunn Ongst un Boang.-
 Wonn donn im Feld en Acker brennt,
 do kimmt aa schunn die Feierwehr gerennt,
 un gibt er bestes, löscht Brond un Dorscht,
 denoch gibt's Weck, Woi un aa Worscht.



Neilich, dort hinne on de Eiseboh,
 fängt en Stoppelacker zu brenne oh,
 Sirengebrumm, die Wehr muß sich beeile,
 mer sieht se on ehr Spritzeheisje keile,
 alle springe in die rot-weiß Schees,
 donn geht's fort mit Blaulicht un Gedees.-

Uff oamol kimmt dorchs Owwerdorf gefahrn,
 de Rudi mi'm Fahrrad un em Affezahn,
 springt ins Spritzeheisje mit Horrido,
 zieht sich die Feierwehr-Montur schnell oh,
 setzt uff de Bock sich wirrer druff,
 un nimmt gleich die Verfolgung uff.
 Ehr fährt em Spritzeauto hinnedrin,
 do sitzt nämlich soin Bruder drin,
 er triet in die Pedale, er es jo fit,
 duht mächtisch winke : "Nemmt mich noch mit!"
 De Rainer awwer hot nur Oans im Hern,
 "Des Feier derf net greeßer wern!"
 So rast'er weiter, vum Glick beseelt,
 indes de Rudi sich mi'm Fahrrad queelt.-


Donk dem schnelle Oisatz von de Wehr,
 hat des Feier gar koa Chongse mehr,
 es wurd gelöscht in Windeseile,
 do konnt der Rudi sich aa noch so eile,
 bis er mi'm Fahrrad an Brandes Stelle,
 do hat die Feierwehr mol uff die schnelle,
 des Feier korzentschlosse,
 mit Wasser oafach ausgegosse.

Fer'n Rudi gab's donn nix zu mache,
 die gonz Feierwehr die war om lache,
 wie'rer mit soim Fahrrad hergefplitzt,
 die gonz Montur voll dorchgeschwitzt,
 fer nix un wirrer nix, sich obgequeelt,
 drum kriggt er jetz e Lied gespeelt.
 Doch vorher muss ich soin Oisatz lowe,
 do soin mer, wonns brennt, gut uffgehowe,
 bei so veel pflichtbewußtsoi, ich soachs frei raus,
 do geht jed' Feier, vun gonz alloa schunn aus,
 dem Rudi singe mer dodefehr, statt Horrido,
 "JA MER SANN MI'M RADL DO...."



Ich hob en Brond, wie kann des soi?
 Do hilft nur e Gloas mit Kerwewoi,
 der kann den Brond zwar net verhindern,
 awwer ehr duht moi Quale bisje lindern.

Seit longem duh ich mich schunn ploache,
 es schlägt mer ständisch uff de Moache,
 wie zwaa vun uns honn leide misse,
 un des im Urlaab, mist'er wisse.
 Die honn sich in e Fluuchzeuch noigesetzt,
 soin ab noch Venezuela donn gefetzt,
 wie'se im Urlaab endlich oagekumme,
 soin im Schweiß die zwee baal fortgeschwumme,
 mer legt sich also uhverdrosse,
 on de Strond mit Taucherflosse,
 de Mädsher duht des gefalle,
 aa wonn mer uff die Noas duht falle,
 als Bodehos do trägt mer nix,
 a bei de Mädsher sieht mer fast die B...,
 es werd geguckt noach Bobbes un noach Buse,
 aa fer e Schwätzje hot mer Zeit un Muse,
 im Meer do es derweil die Hölle los,
 do boade Mädsher kloa un groß,
 wie Meerjungfraue duhn die doller,
 die Kerl om Strond nur noch die Aache rolle,
 ja wonn mer so veel Auswahl hat,
 do kriegt jeder Oa, des geht schunn glatt.



Aa die Worfeller Strond-Kanone,
 warn alle zwee net gonz ohne,
 der Oane lacht in de Strandbar sich o Oa,
 macht morz de Halles, zieht ab soi Show,
 bis do de Vater kimmt, vun dere Kloane,
 ihm uff Sponisch segt: "Ich soach der blos des Oane,
 wonn du wos willst vun moine Tochter hier,
 mußt du heiraten, sonst helf ich dir!"
 Der Dabbes hat vum Sponisch nix geblickt,
 doch hat er dem Vater kräftisch zugenickt,
 do war fer den die Sach in Butter,
 sie lädt en oi, zu ehrne Mutter,
 er macht mit un guckt gonz groß,
 do sitzt die gonz Familie, wos soll des blos.
 Plötzlich ihm die Sach so longsom dämmert,
 "Die wolle mich verheirn, ei soin die donn behämmert!?"
 "Nix wie fort", hot er sich do gedenkt,
 koan Gedonke on soin Flört verschenkt,
 nimmt soi Boa schnell in die Hond,
 sunst wär'er jetzt noch in dem fremme Lond.

Ja un gonz dick do kimmt es jetzt zum Schluß,
 weil ich noch schnell verzehle muß,
 daß die zwee Doller, ich muß'es eich gestehe,
 hier uff de Bühne vor Eich stehe,
 es Schmidt's ehrn Rainer un moi Wenischkeit,
 mer soin dehoam, ehr liebe Leit!
 Drum soin mer froh, un singe heit,
 "EIN PROSIT DER GEMÜTLICHKEIT!"


Schunn wirrer duht moi Lewwer zwicke,
 aa moi Bloas die is schunn bees om dricke,
 drum wink dem Holger ich mol korz,
 loss dodebei noch schnell en Forz,
 heb moi Gloas un Prost eich zuh,
 ich hoff donn gibt die Lewwer Ruh'.



Wonn mer dehoam es gonz alloa,
 un aa net groß es, sondern kloa,
 wonns dunkel werd zur Nacht,
 un in jedem Winkel ebbes kracht,
 wonn donn de Wind ums Hauseck braust,
 so monchem do die Muffe saust.
 Schieß zu hoa, des muß ich soache,
 es fer veele Leit e Ploache,
 de gonze Körper fängt oa zu zittern,
 mer duht iwverall wos beeses wittern,
 de Schweiß steht uff de Stern,
 mer hot nur noch dumm Zeig im Hern,
 drum geht mer donn, ehr glaabt des net,
 nur noch bewaffnet in soi Bett,
 daß mer gerüst es, fer den Fall,
 im Kino sieht mer's iwverall,
 wonn so e Monster vor Oam steht,
 un ferchterlich die Aache dreht.



De Hansi iwvers Wocheend,
 mit de Hondballer noach Bremen rennt,
 un hot die Tina, wos fer Bosse,
 derweil alloa dehoam gelosse.
 Ehr Leit wos hat die Owends fer en Bammel,
 die gonze Deern warn zugerammelt,
 die gonze Fenster die warn zu,
 un trotzdem hat'se noch koa Ruh,
 hot sich e Kischmesser holle misse,
 un legt's em Hansi unners Kisse.
 So schläft mer schunn veel Besser,
 im Fall des Falles hot mer jo e Messer.
 So leit'se im Bett, ängstlich wie e Maus,
 vun de Tante guckt koa Stickelche meh eraus,
 un waagt druff, daß de Moijend kimmt,
 der donn die Ongst schnell vun'rer nimmt.
 Om nächste Owend, de Hansi war wirrer do,
 geht'er vorm Schloafe schnell mol uff de Klo,
 er springt ins Bett gonz uhverdrosse,
 un will sich noch mol kraule losse,
 vorher greift er, des misst'er wisse,
 noch schnell mol unners Kisse.-
 Do fiehlt er's schunn, des es koan Witz,
 do leit jo ebbes long un spitz,
 un war debei, um Haaresbreite,
 sich in de Finger noi zu schneide,
 die Tina nämlich, meine Fresse,
 hat des Messer glatt vergesse.-
 Doch zum Glick es beiden nix bassiert,
 de Hansi hot alle Messer oikassiert,
 un's nächste Mol, des soach ich hier,
 do dun die Kerweborsch fern Kaste Bier,
 es gonze Wocheend, jertz duht net lache,
 die Tante pflèche un bewache!
 Un fer die Tina, do singe mer so gut es geht:
 "WENN DAS SO WEITER GEHT...!"



Des alles, wos ich hier glossiert,
es im letzte Johr bei uns bassiert,
un wie immer, ehr liewe Leit,
wonn sich de Spruch soim Enn' zu neigt,
wern alle die mit Dank vun uns bedoacht,
die bei unserm Umzuuch mitgemoacht,
un nadierlich bedonke mer uns donn,
bei Allen die uns mit Rat un Tat geholfe honn!-

So klingt'er aus, de Kerwespruch,
ich moan fer Desjohr wär's genuch -
Vor unserm Holger zieh ich noch moin Hut,
"Fer's erstemol, do es des super gut!"
Immerhin so derf ich eich berichte,
duht'er ob jetz de Spruch zusommedichte,
daß des net leicht es, des kennt ehr eich jo denke,
vor jeder Kerb do muß mer sich soi Hern verrenke,
damit der Kerwevadder donn,
om Umzuuch wos verzehle kann -
Die gonze Johnn hot unsern Gerold des geritzt,
hot sich monch Stunne obgeschwitzt,
wos die Leit es Johr so honn getrewwe,
hot er Versform in de Spruch geschrewwe,
aa dodefer do duh ich recht herzlich mich bedonke,
mer duhn nochher mi'nonner Oaner tonke,
endlich do hoste Oaner gefunne,
der doi schwer Ämtsche oagenumme,
mer wünsche'm Glick un veel Ideeje,
net daß mer ohne Kerwespruch do steje.

Genuch vun unsre Schreiwier jetzt,
unsern Kerwewatz der guckt schunn gonz entsetzt,
soi Zung die hängt schunn on de Knie,
soll haaße, "Beeil dich jetz, ich brauch moi Brie!",
drum mach ich Schluß mit moim Geschwätz,
spring uff die Kutsch mit große Sätz,
un ruf ich zu, ehr liewe Leit,
ehr wißt jo alle schunn Bescheid,
heit Owend marschiern mer wirrer dorch die Sääl,
mit Woi do eele mer die staawisch Kääl,
e Schnitzel werd gesse, un donn geht's rund,
mer Kerweborsch treiwe's wirrer rischtisch bunt,
beim Monfred do es die Kacke baal om dompe,
on de Deck do wackele donn die Lompe,
de gonze Soal der leit schunn flach,
die Hiet die flije bis on's Dach,
mer losse's raache in alle Ecke,
dunn donze, wie die Lumpe on de Steck -

Ich soach nur Oans, ehr Leit seit fit,
kummt heit Owend un macht mit,
mer dunn schunkele un dunn lache,
bis das im Soal die Disch zusommekrache,
denn beim Monfred, do soin mer alle froh,
wonn's haaßt: "DIE WOLFELLER KERB ES DO!"

